

四庫全書

集部

欽定四庫全書

集部

石倉歷代詩選卷四十

詳校官庶吉士_臣范逢恩

侍讀_臣孫球覆勘

總校官進士_臣朱鈐

校對官編修_臣盛惇崇

謄錄監生_臣史復瑄

欽定四庫全書

石倉歷代詩選卷四十

明 曹學佺 編

盛唐九

岑參

南陽人文
本之後

初至西號官舍南池呈左右省及南宮諸故人

黜官自西掖待罪臨下陽空積犬馬戀豈思鵝鷺行素
多江湖意偶佐山水鄉滿院池月靜捲簾谿雨涼軒窓

竹翠濕素牘荷花香白鳥上衣桁青苔生筆牀數公不
可見一別盡相忘早年迷進退晚節悟行藏他日能相
訪嵩南舊草堂

秋夜宿仙遊寺南涼堂呈謙道人

太乙連太白兩山知幾重路盤石門窄匹馬行才通日
西到山寺林下逢支公昨夜山北時星星聞此鐘秦女
去已久仙臺在中峰簫聲不可聞此地留遺蹤石潭積
黛色每歲投金龍亂流爭迅湍噴薄如雷風夜來聞清

磬月出蒼山空空山滿清光水樹相玲瓏迴廊映密竹
秋殿隱深松燈影落前谿夜宿水聲中愛茲林巒好結
宇向谿東相識惟山僧鄰家一釣翁林晚栗初坼枝寒
梨已紅物幽興易愜事勝趣彌濃願謝區中緣永依金
人宮寄報乘輦客替裾爾何容

潼關使院懷王七季友

王生令才子時輩咸所仰何當見顏色終日勞夢想驅
車到關下欲往阻河廣滿目徒春華思君罷心賞開門

見太華朝日映高掌忽覺蓮花峰別來更如長無心顧
微祿有意在獨往不負林中期終當出塵網

至大梁却寄匡城主人

一從棄漁釣十載干明王無由謁天階却欲歸滄浪仲
秋至東郡遂見天雨霜昨日夢故山蕙草色已黃平明
辭鐵丘薄暮遊大梁仲秋蕭條景拔刺飛鵝鷄四郊陰
氣閉萬里無晶光長風吹白茅野火燒枯桑故人南燕
吏籍籍名更香聊以玉壺贈置之君子堂

宿華陰東郭客舍憶閭防

次舍山郭近解鞍鳴鐘時主人炊新粒行子充夜饑關
月生首陽照見華陰祠蒼茫秋山晦蕭瑟寒松悲久從
園廬別遂與朋知辭舊壑蘭杜晚歸軒今已遲

宿東谿王屋李隱者

山店不鑿井百家同一泉晚來南村黑雨色和人煙霜
畦吐寒菜沙雁噪河田隱者不可見天壇飛鳥邊

郊行寄杜位

嶠嶮空城煙淒清寒山景秋風引歸夢昨夜到汝潁近
寺聞鐘聲映陂見樹影所思何由見東北徒引領

西蜀旅舍春歎寄朝中故人呈狄評事

春與人相乖柳青頭轉白生平未得意覽鏡私自惜四
海猶未安一身無所適自從兵戈動遂覺天地窄功業
悲後時光陰嘆虛擲却為文章累幸有開濟策何負當
途人心無矜窘厄回瞻後來者皆欲肆轡轡起草思南
宮寄言憶西掖時危任舒卷身退知損益窮巷草轉深

閒門日將夕橋西暮雨黑籬外春江碧昨者初識君相
看俱是客聲華同道術世業通往昔早須歸天階不得
安孔席吾先稅歸鞅舊國如咫尺

宿太白東谿李老舍即事寄弟姪

渭上秋雨過北風何騷騷天晴諸山出太白峰最高主
人東谿老兩耳生長毫遠近知百歲子孫皆二毛中庭
井欄上一架獼猴桃石泉飯香粳酒甕開新糟愛茲田
中趣始悟世上勞我行有勝事書此寄爾曹

上嘉州青衣山中峰題惠淨上人幽居寄兵部

楊郎中

并序

青衣之山在大江之中屹然迥絕崖壁蒼峭周廣
千里長波四匝有惠淨上人廬于其巔惟繩牀竹
杖而已恒持蓮花經十年不下山予自公浮舟聊
一登眺友人夏官弘農楊侯清談之士也素工為
文獨立於世與余有方外之約每多獨往之意今
者幽躅勝概歎不得與此公俱爰命小吏刮磨石

壁以識其事乃詩以達楊友爾

青衣誰開鑿獨在水中央浮舟一躋攀側逕緣

一作沿穹

蒼絕頂詣

一作訪

老僧豁然登上方諸嶺一何小三江奔

茫茫蘭若向西開峨眉正相當猿鳥樂鐘磬松羅泛天

香江雲入袈裟山月吐繩牀早知清淨理久乃機心忘

尚以名宦拘聿來夷獠鄉吾友不可見鬱為尚書郎早

歲愛丹經留心向青囊渺渺雲智遠幽幽海懷長勝賞

欲與俱引領遙相望為政愧無術分憂幸時康君子滿

天朝老夫憶滄浪况值廬山遠抽簪歸法王

羣北秋興寄崔明允

白露披梧桐玄蟬晝夜號秋風萬里動日暮黃雲高君
子佐休明小人事蓬蒿所適在魚鳥焉能徇錐刀孤舟
向廣武一鳥歸成臯勝概日相與思君心鬱陶

春遇南使貽趙知音

端居春心醉襟背思樹萱美人在南州為爾歌北門北
風吹煙物戴勝鳴中園枯楊長新條芳草滋舊根網絲

結寶琴塵埃被空樽適遇江海信聊與南客論

終南雲際精舍尋法澄上人不過歸高冠東潭

石淙望秦嶺微雨作貽友人

昨夜雲際宿旦從西峰回不見林中僧微雨潭上來諸
峰皆青翠秦嶺獨不開石鼓有時鳴秦王安在哉東南
雲開處突兀獼猴臺崖口懸瀑流半空白皚皚噴壁四
時雨傍村終日雷北瞻長安道日夕生塵埃若訪張仲
蔚衡門滿蒿萊

敬酬杜華淇上見贈兼呈熊曜

杜侯實才子盛名不可及祇曾效一官今已年四十是
君同時者已有尚書郎憐君獨未遇淹泊在他鄉我從
京師來到此喜相見共論窮途事不覺淚滿面憶昨癸
未歲吾兄自江東得君江湖詩骨氣凌謝公熊生尉淇
上開館常待客喜我二人來歡笑朝復夕縣樓壓春岼
戴勝鳴花枝吾徒在舟中縱酒兼彈棋三月猶未還客
愁滿春草賴蒙瑤華贈諷詠慰懷抱

號中酬陝西甄判官見贈

微才棄散地拙宦慙清時白髮徒自負青雲難可期胡
塵暗東洛亞相方出師分陝振鼓輦二嶠滿旌旗夫子
廊廟器迥然青真姿閫外佐戎律幕中吐兵奇前者驛
使來忽枉行軍詩晝吟庭花落夜諷山月移昔君隱蘇
門浪跡不可羈詔書自徵用令譽天下知別來春草長
東望轉相思寂寞山城暮空聞畫角悲

武威送劉單判官赴安西行營便呈高開府

熟海亘鐵門火山赫金方白草磨天涯胡沙莽茫茫夫
子佐戎幕其鋒利如霜中歲學兵符不能守文章功業
須及時立身有行藏男兒感忠義萬里忘越鄉孟夏邊
候遲胡國草木長馬疾過飛鳥天窮超夕陽都護新出
師五月發軍裝甲兵二百萬錯落黃金光揚旗拂崑崙
伐鼓震蒲昌太白引官軍天威臨大荒西望雲似蛇戎
夷知喪亡渾驅大宛馬繫取樓蘭王曾到交河城風土
斷人腸寒驛遠如點邊烽互相望赤亭多颼風鼓怒不

可當有時無人行沙石亂飄揚夜靜天蕭條鬼哭夾道
傍地上多髑髏皆是古戰場置酒高館夕邊城月蒼蒼
軍中宰肥牛堂上羅羽觴紅淚金燭盤嬌歌艷新妝望
君仰青冥短翮難可翔蒼然西郊道握手何慨慷

北庭貽宗學士道別

萬事不可料歎君在軍中讀書破萬卷何事來從戎曾
逐李輕車西征出太蒙荷戈月窟外擐甲崑崙東兩度
皆破胡朝廷輕戰功十年祇一命萬里如飄蓬容鬢老

胡塵衣裘脆邊風忽來輪臺下相見披心胸飲酒對春
草彈棋聞夜鐘今且還龜茲臂上懸角弓平沙向旅館
匹馬隨飛鴻孤城倚大碛海氣迎邊空四月猶自寒天
山雪濛濛君有賢主將何謂泣途窮時來整六翮一舉
凌蒼穹

送許拾遺恩歸江寧拜親

詔書下青瑣駟馬還吳洲束帛仍賜衣恩波漲滄流微
祿將及親向家非遠遊看君五斗米不謝萬戶侯適出

西掖垣如到南徐州歸心望海日鄉夢登江樓大江盤
金陵諸山橫石頭楓樹隱茅屋橘林繁漁舟種藥疏故
畦釣魚垂直鉤對月京口夕觀濤海門秋天子憐諫官
論事不可休早來丹墀下高駕無淹留

虢州郡齋南池幽興因與閭二侍御道別

池色淨天碧水涼雨淒淒快風從東南荷葉翻向西性
本愛魚鳥未能返巖谿中歲徼微官遂令心賞睽及茲
佐山郡不異尋幽棲小吏趨竹徑訟庭侵藥畦胡塵暗

河洛二陝震鼓輦故人佐戎軒逸翮凌雲霓行軍在函
谷兩度聞鶯啼相看紅旗下飲酒白日低聞君欲朝天
馳馬臨道嘶仰望浮與沉忽如隔雲泥夜眠驛樓月曉
發關城雞惆悵西郊暮鄉書對君題

青龍招提歸一上人遠遊吳楚別詩

久交應真侶最歎青龍僧棄官向二年削髮歸一乘了
然瑩心身潔念樂空寂名香泛窗戶幽磬清曉夕往年
仗一劍由是佐二庭於焉久從戎兼復解論兵世人猶

未知天子願相見
朝從青蓮宇暮入白虎殿
宮女擎錫杖御筵出香爐
說法開藏經論邊窮陣圖忘機厭塵喧
浪跡向江海思師石可訪
惠遠峰猶在
今旦飛錫去何時
持鉢還湖煙冷吳門淮月銜
楚山一身如浮雲萬里過
江水相思眇天外南望無窮已

送李翥遊江外

相識應十載見君只一官
家貧祿尚薄霜降衣仍單
惆悵秋草死蕭條芳歲闌
且尋滄洲路遙指吳雲端
匹馬

關塞遠孤舟江海寬
夜眠楚煙濕曉飯湖山寒
砧淨紅鱸落袖香
朱橘團帆前見禹廟枕底聞嚴灘
便獲賞心趣豈歌行路難
青門湏醉別少為解征鞍

送狄員外巡按西山軍

兵馬守西山中國非得計
不知何代策空使蜀人弊
八州崖谷深千里雲雪閉
泉澆閣道滑水凍繩橋脆
戰士常苦饑糗糧不相繼
胡兵猶不歸空山積年歲
儒生識損益言事皆審諦
狄子幕府郎有謀必康濟
胸中懸明

鏡照耀無巨細莫辭冒險艱可以裨節制相思江樓夕
愁見月澄霽

虢州送鄭興宗弟歸扶風別廬

佐郡已三載豈能長後時出關少親友賴汝常相隨今
旦忽言別愴然俱淚垂平生滄洲意獨有青山知州縣
不敢說雲霄誰敢期因懷東谿老最憶南峰緇為我多
種藥還山應未遲

澧頭送蔣侯

君住澧水北我家澧水西兩村辨喬木五里聞鳴雞飲
酒谿雨過彈碁山月低徒聞蔣生徑爾去誰相攜

送永壽王贊府逕歸縣

當官接閒暇暫得歸林泉百里路不宿兩鄉山復連夜
深露濕簾月出風驚蟬且盡主人酒為君從醉眠

南池宴餞辛子賦得蚪斗子

臨池見蚪斗羨爾樂有餘不憂網與釣幸得免為魚且
願充文字登君尺素書

登嘉州凌雲寺作

寺出飛鳥外青峰戴朱樓
擣壁躋半空喜得登上頭
始知宇宙濶下看三江流
天晴見峨眉如向波上浮
迥曠煙景豁陰森棕枿稠
願割區中緣永從塵外遊
迴風吹虎穴片雨當龍湫
僧房雲濛濛夏月寒飈飈
迴合俯近郭寥落見遠舟
勝概無端倪天宮可淹留
一官何足道欲去令人愁

與高適薛據登慈恩寺浮圖

塔勢如湧出孤高聳天宮登臨出世界磴道盤虛空
兀壓神州崢嶸如鬼工四角礙白日七層摩蒼穹下窺
指高鳥俯聽聞驚風連山若波濤奔湊似朝東青槐夾
馳道宮館何玲瓏秋色從西來蒼然滿關中五陵北原
上萬古青濛濛淨理了可悟勝因夙所宗誓將挂冠去
覺道資無窮

出關經華嶽寺訪法華雲公

野寺聊解鞍偶見法華僧開門對西嶽石壁青稜層竹

徑厚蒼苔松門盤紫藤長廊列古畫高殿懸孤燈五月
山雨熱三峰火雲蒸側聞樵人言深谷猶積冰久願尋
此山至今嗟未能謫官忽東走王程苦相仍欲去戀雙
樹何由窮一乘月輪吐山郭夜色空清澄

春半與羣公同遊元處士別業

郭南處士宅門外羅群峰勝概忽相引春華令正濃山
厨竹裏爨野碓藤間春對酒雲數片捲簾花萬重巖泉
嗟到晚州縣欲歸慵草色帶朝雨灘聲兼夜鐘愛茲清

俗慮何事老塵容况有林下約轉懷方外蹤

陪羣公龍岡寺泛舟

漢水天一色寺樓波底看鐘鳴長空夕月出孤舟寒映
酒見山火隔簾聞夜灘紫鱗掣芳餌紅燭然金盤良友
興正愜勝遊情未闌此中堪倒載須盡主人歡

終南山雙峰草堂作

斂迹歸山田息心謝時輩晝還草堂卧但與雙峰對興
來恣佳遊事愜符勝概著書高窗下日夕見城內曩為

世人誤遂負平生愛久與林壑辭及來松杉大偶茲精
廬近數預名僧會有時逐樵漁盡日不冠帶崖口上新
月石門破蒼靄色向羣木深光搖一潭碎緬懷鄭生谷
頗憶嚴子瀨勝事猶可追斯人邈千載

緱山西峰草堂作

結廬對中嶽青翠常在門遂耽水木興盡作漁樵言頃
來闕章句但欲閒心魂日色隱空谷蟬聲喧暮村曩聞
道士語偶見清淨源隱几聞吹葉乘秋眺歸根獨遊念

求仲開徑招王孫片雨下南澗孤峰出東原棲遲慮益
淡脫畧道彌敦野靄晴拂枕客帆遙入軒向平今何在
此意誰與論佇立雲去盡蒼蒼月開園

尋鞏縣南李處士別業

先生近南郭茅屋臨東川桑葉隱村戶蘆花映釣船有
時著書暇盡日窗中眠且喜閭井近灌田同一泉

聞崔十二侍御灌口夜宿報恩寺

聞君尋野寺便宿支公房谿月冷深殿江雲擁迴廊然

燈松林靜煮茗烹門香勝事不可接相思幽興長

南池夜宿思王屋青蘿舊齋

池上卧煩暑不櫛復不巾有時清風來自謂羲皇人天
晴雲歸盡雨洗月色新公事常不閒道書日生塵早年
家王屋五別青蘿春安得還舊山東谿垂釣綸

過王判官西津所居

勝迹不在遠愛君池館幽素懷巖中諾宛得塵外遊何
必到清谿忽來見滄洲潛移岷山石暗引巴江流樹密

晝先夜竹深夏已秋沙鳥上筆牀谿花萼簾鈎夫子賤
簪冕注心向林丘落日出公堂垂綸乘釣舟賦詩憶楚
老載酒隨江鷗脩然一傲吏獨在西津頭

題華嚴寺環公禪房

寺南幾十峰峰翠晴可掬朝從老僧飯昨日崖口宿錫
杖倚枯松繩牀映深竹東谿草堂路來往行自熟生事
在雲山誰能復羈束

驪姬墓下作

夷吾重耳墓隔
河相去十三里

驪姬北原上閉骨已千秋澮水日東注惡名終不流獻
公恣耽惑視子如仇讎此事成蔓草我來逢古丘蛾眉
山月苦蟬鬢野雲愁欲弔二公子橫汾無輕舟

先主武侯廟

先主與武侯相逢雲雷際感通君臣分義激魚水契遺
廟空蕭然英靈貫千歲

文公講堂

文公不可見空使蜀人傳講席何時散高臺豈復全豐

碑文字滅冥漠不知年

司馬相如琴堂

相如琴臺古人去臺亦空臺上寒蕭條至今多悲風荒
臺漢時月色與舊時同

嚴君平卜肆

君平曾賣卜卜肆蕪已久至今杖頭錢時時地上有不
知支機石還在人間否

暮秋山行

疲馬卧長坂夕陽下通津山風吹空林颯颯如有人蒼
旻霽涼雨石路無飛塵千念集暮節萬籟悲蕭晨鷓鴣
昨夜鳴蕙草色已陳况在遠行客自然多苦辛

題鐵門關樓

鐵關天西涯極目少行客關門一小吏終日對石壁橋
跨千仞危路盤兩崖窄試登西樓望一望頭欲白

早上五盤嶺

平旦驅馬四馬曠然出五盤江迴兩崖闔日隱羣峰攢蒼

翠煙景曙森沉雲樹寒松踈露孤驛花密藏迴灘棧道
谿雨滑畬田原草乾此行為知己不覺蜀道難

郡齋閒坐

負郭無良田屈身徇微祿平生好踈曠何事就羈束幸
曾趨丹墀數得侍黃屋故人盡榮寵誰念此幽獨州縣
非宿心雲山欣滿目頃來廢章句終日披案牘佐郡竟
何成自悲徒碌碌

衙郡守還

世事何反覆一身難可料頭白翻折腰還家私自笑所
嗟無產業妻子嫌不調五斗米留人東谿憶垂釣

臨河客舍呈狄明府兄留題縣南樓

黎陽城南雪正飛黎陽渡頭人未歸河邊酒家堪寄宿
主人小女能縫衣故人高卧黎陽縣一別三年不相見
邑中雨雪偏著時隔河東郡人遙羨鄴都惟見古時丘
漳水還如舊日流城上望鄉應不見朝來好是懶登樓

白雪歌送武判官歸京

北風捲地白草折胡天八月即飛雪忽如一夜春風來
千樹萬樹梨花開散入珠簾濕羅幕孤裘不煖錦衾薄
將軍角弓不得控都護鐵衣冷難著瀚海闌干百丈冰
愁雲慘淡萬里凝中軍置酒飲歸客胡琴琵琶與羌笛
紛紛暮雪下轅門風掣紅旗凍不翻輪臺東門送君去
去時雪滿天山路山迴路轉不見君雪上空留馬行處

輪臺歌奉送封大夫出師西征

輪臺城頭夜吹角輪臺城北旄頭落羽書昨夜過渠黎

單于已在金山西戍樓西望煙塵黑漢兵屯在輪臺北
上將擁旄西出征平明吹笛大軍行四邊伐鼓雪海湧
三軍大呼陰山動虜塞兵起連雲屯戰場白骨纏草根劒
河風急雲片濶沙飛石凍馬蹄脫亞相勤王甘苦辛誓
將報主靜邊塵古來青史誰不見今見功名勝古人

天山雪歌送蕭治歸京

天山雪雲常不開千峰萬嶺雪崔嵬北風夜捲赤亭口
一夜天山雪更厚能兼漢月照銀山復逐胡風過鐵關

交河城邊飛鳥絕輪臺路上馬蹄滑
暗靄寒氛萬里凝
闌干陰崖千丈冰將軍狐裘卧不煖
都護寶刀凍欲斷
正是天山雪下時送君走馬歸京師
雪中何以贈君別
惟有青青松樹枝

走馬川行奉送出師西征

君不見走馬川行雪海邊平沙莽莽黃入天
輪臺九月風夜吼一川碎石大如斗
隨風滿地石亂走
匈奴草黃馬正肥
金山西見煙塵飛
漢家大將西出師
將軍金甲

夜不脫半夜軍行戈相撥風頭如刀面如割馬毛帶雪
汗氣蒸五花連錢旋作冰幕中草檄硯水凝虜騎聞之
應膽懾料知短兵不敢接車師西門佇獻捷

函谷關歌送劉評事使關西

君不見函谷關崩城毀屋至今在樹根草蔓遮古道空
谷千年長不改寂寞無人空舊山聖朝無外不須關白
馬公孫何處去青牛老人更不還蒼苔白骨空滿地月
與古時長相似野花不省見行人山鳥何曾識關吏故

人方乘使者車吾知郭丹却不如請君時憶關外客行
到關西多致書

胡笳歌送顏真卿使赴河隴

君不聞胡笳聲最悲紫髯綠眼胡人吹吹之一曲猶未
了愁殺樓蘭征戍兒涼秋八月蕭關道北風吹斷天山
草崑崙山南月欲斜胡人向月吹胡笳胡笳怨兮將送
君秦山遙望隴山雲邊城夜夜多愁夢向月胡笳誰喜
聞

秦箏歌送外甥蕭正歸京

汝不聞秦箏聲最苦
五色纏絃十三柱
怨調慢聲如欲語
一曲未終日移午
紅亭水木不知暑
忽彈黃鐘和白紵
清風颯來雲不去
聞之酒醒淚如雨
汝歸秦兮彈秦聲
秦聲悲兮聊送汝

與獨孤漸道別長句兼呈嚴八侍御

輪臺客舍春草滿
潁陽歸客腸堪斷
窮荒絕漠鳥不飛
萬磧千山夢猶嬾
憐君白面一書生
讀書千卷未成名

五侯貴門脚不到數畝山田身自耕興來浪迹無遠近
及至辭家憶鄉信無事垂鞭信馬蹄西南幾欲窮天盡
奉使三年獨未歸邊頭詞客舊來稀借問君來得幾日
到家不覺換春衣高齋清晝捲羅幕紗帽接羅幃不著
中酒朝眠日色高彈碁夜半燈花落冰片高堆金錯盤
滿堂凜凜五月寒桂林蒲萄新吐蔓武城刺蜜未可餐
軍中置酒夜撾鼓錦筵紅燭月未午花門將軍善胡歌
葉河蕃王能漢語知爾園林壓渭濱夫人堂上泣羅裙

魚龍川北盤谿雨鳥鼠山西洮水雲臺中嚴公於我厚
別後新詩滿人口自憐棄置天西頭因君為問相思否

送費子歸武昌

漢陽歸客悲秋草旅舍飛愁不掃秋來倍憶武昌魚
夢著只在巴陵道曾隨上將過祈連離家十年恒在邊
劍鋒可惜虛用盡馬蹄無事今已穿知君開館常愛客
糲蒲百金每一擲平生有錢將與人江上故園空四壁
吾觀費子毛骨奇廣眉大口仍赤髭看君失路尚如此

人生貴賤那得知高秋八月歸南楚東門一壺聊出祖
路指鳳凰山北雲衣沾鸚鵡洲邊雨勿歎蹉跎白髮新
應須守道勿羞貧男兒何必戀妻子莫向江村老却人

燉煌太守後庭歌

燉煌太守才且賢郡中無事高枕眠太守到來山出泉
黃砂磧裏人種田燉煌耆舊鬢皓然願留太守更五年
城頭月出星滿天曲房置酒張錦筵美人紅妝色正鮮
側垂高髻挿金鈿醉坐藏鉤紅燭前不知鉤在若箇邊

為君手把珊瑚鞭射得半段黃金錢此中樂事亦已偏

喜韓樽相過

三月灞陵春已老故人相逢耐醉倒甕頭春酒黃花脂
祿米只充沽酒資長安城中足年少獨共韓侯開口笑
桃花點地紅斑斑有酒留君且莫還與君兄弟日攜手
世上虛名好是閒

銀山磧西館

銀山磧口風似箭鐵門關西月如練雙雙愁淚沾馬毛

颯颯胡沙迸人面丈夫三十未富貴安能終日守筆硯
感遇

五花驄馬七香車云是平陽帝子家鳳凰城頭日欲斜
門前高樹鳴春鴉漢家魯元君不聞今作城西一古墳
昔來惟有秦王女獨自吹簫乘白雲

太白胡僧歌

并序

太白中峰絕頂有胡僧不知幾百歲眉長數寸身
不製繒帛衣以草葉恒持楞伽經雲壁迥絕人迹

罕到嘗東峰有聞虎弱者將死僧杖而解之西湫
有毒龍久而為患僧噐而貯之商山趙叟前年采
茯苓深入太白偶值此僧訪我而說予恒有獨往
之意聞而悅之乃為歌曰

聞有胡僧在太白蘭若去天三百尺一持楞伽入中峰
世人難見但聞鐘窗邊錫杖解兩虎牀下鉢盂藏一龍
草衣不針復不線兩耳垂肩眉覆面此僧年幾那得知
手種青松今十圍心將派水同清淨身與浮雲無是非

商山老人已曾識願一見之何由得山中有僧人不知
城裏看山空黛色

衛節度赤驃馬歌

君家赤驃畫不得一團旋風桃花色紅纓紫鞵珊瑚鞭
玉鞍錦韉黃金勒請君韝出看君騎尾長窄地如紅絲
自矜諸馬皆不及却憶百金新買時香街紫陌鳳城內
滿城見者誰不愛揚鞭驟急白汗流弄影行驕碧蹄碎
紫髯胡雛金剪刀平明剪出三鬢高檻上看時獨意氣

衆中牽出偏雄豪，騎將獵向南山口。
城南狐兔不復有，草頭一點疾如飛。
卻使蒼鷹翻向後，憶昨看君朝未央。
鳴珂擁蓋滿路香，始知邊將真富貴。
可憐人馬相輝光，男兒稱意得如此。
駿馬長鳴北風起，待君東去掃胡塵。
為君一日行千里。

裴將軍宅蘆管歌

遼東九月蘆葉斷，遼東小兒采蘆管。
可憐新管清且悲，一曲風飄海頭滿。
海樹蕭索天雨霜，管聲寥亮月蒼蒼。

白狼河北堪愁恨，玄兔城南皆斷腸。
遼東將軍長安宅，美人蘆管會佳客。
弄調啾飀勝洞簫，發聲窈窕欺橫笛。
夜半高堂客未回，祇將蘆管送君杯。
巧能陌上驚楊柳，復向園中誤落梅。
諸客愛之聽未足，高捲珠簾列紅燭。
將軍醉舞不肯休，更使美人吹一曲。

玉門關蓋將軍歌

蓋將軍真丈夫，行年三十執金吾。
身長七尺頗有鬚，玉門關城迥且孤。
黃沙萬里白草枯，南鄰大戎北接胡。
將軍

軍到來備不虞五千甲兵膽力麤軍中無事但歡娛暖
屋繡簾紅地爐織成壁衣花毼燈前侍婢瀉玉壺金
鐙亂點野酡酥紫紱金章左右趨問著只是蒼頭奴美
人一雙閒且都朱唇翠眉映明矐清歌一曲世所無今
日喜聞鳳將雛可憐絕勝秦羅敷使君五馬謾踟躕野
草繡窠紫羅襦紅牙縷馬對樗蒲玉盤纖手撒作盧衆
中誇道不曾輸櫪上昂昂皆駿駒桃花叱撥價最殊騎
將獵向城南隅臘日射殺千年狐我來塞外按邊儲為

君取醉酒剗沽醉爭酒盞相喧呼忽憶咸陽舊酒徒

送郭又雜言

地上青草出經冬今始歸博陵無近信猶未換春衣憐
汝不忍別送汝上酒樓初行莫早發且宿灞橋頭功名
須及早歲月莫虛擲早年已工詩近日兼注易何時過
東洛早晚度盟津朝歌城邊柳隰地邯鄲道上花撲人
去年四月初我正在河朔曾上君家縣北樓樓上分明
見恒嶽中山明府待君來須計行程及早回到家速覓

長安使汝自書封我自開

送宇文南金放後歸太原寓居因呈太原郝主

簿

歸去不得意北京關路賒却投晉山老愁見汾陽花翻
作灞陵客憐君丞相家夜眠旅舍雨曉辭春城鴉送君
繫馬青門口胡姬壚頭勸君酒為問太原賢主人春來
更有新詩否

登古鄴城

下馬登鄴城城空復何見東風吹野火暮入飛雲殿城隅南對望陵臺漳水東流不復回武帝宮中人去盡年年春色為誰來

邯鄲客舍歌

客從長安來驅馬邯鄲道傷心叢臺下一帶生蔓草客舍門臨漳水邊垂楊不繫釣魚船邯鄲女兒夜沽酒對客挑燈誇數錢酩酊醉時日正午一曲狂歌壚上眠

宿蒲關東店憶杜陵別業

關門鎖歸客一夜夢還家月落河上曉遙聞秦樹鴉長
安二月歸正好杜陵樹邊純是花

寄左省杜拾遺

聯步趨丹陛分曹限紫微曉隨天仗入暮惹御香歸白
髮悲花落青雲羨鳥飛聖朝無闕事自覺諫書稀

七月三日在內學見有高道舉徵宿關西客舍
寄東山嚴許二山人

雲送關西雨風傳渭北秋孤燈然客夢寒杵搗鄉愁灘

上思嚴子山中憶許由蒼生今有望飛詔下林丘

丘中春卧寄王子

田中開白室林下閉玄關卷跡人方處無心雲自閒竹
深喧暮鳥花缺露春山勝事那能說王孫去未還

江行夜宿龍吼灘臨眺思峨眉隱者兼寄幕中

諸公

官舍臨江口灘聲已慣聞水煙晴吐月山火夜燒雲且
欲尋方士無心戀使君異鄉何可住况復久離羣

漢川山行呈成少尹

西蜀方攜手南宮憶比肩平生猶不淺羈旅轉相憐
山店雲迎客江村犬吠船秋來取一醉須待月光眠

敬酬李判官使院即事見呈

公府日無事吾徒只自閒草根侵柱礎苔色上門關
飲硯時見鳥卷簾晴對山新詩吟未足昨夜夢東還

酬崔十三侍御登玉壘山思故園見寄

玉壘天晴望諸峰盡覺低故園江樹北斜日嶺雲西
曠

野看人小長空共鳥齊高山徒仰止不得日攀躋

磧西頭送李判官入京

一身從遠使萬里向安西漢月垂鄉淚胡沙費馬蹄尋
河愁地盡過磧覺天低送子軍中飲家書醉裏題

陪使君早春西亭送王贊府赴選

西亭繫五馬為送故人歸客舍草新出關門花欲飛到
來逢歲酒却去換春衣吏部應相待如君才調稀

漣水東店送唐子歸嵩陽

野店臨官路重城壓御隄山開灞水北雨過杜陵西歸
夢秋能作鄉書醉嬾題橋回忽不見征馬尚聞嘶

水亭送劉顥使還歸節度

無計留君住應須絆馬蹄紅亭莫惜醉白日眼看低解
帶憐高柳移牀愛小谿此來相見少王事各東西

送裴判官自賊中再歸河陽幕府

東郊未解圍忠義似君稀誤落胡塵裏能持漢節歸卷
簾山對酒上馬雪沾衣却向嫖姚幕翩翩去若飛

送陝縣王主簿赴襄陽成親

六月襄陽道三星漢水邊
求凰應不遠去馬賸須鞭
野店愁中雨江城夢裏蟬
襄陽多故事為我訪先賢

送鄭堪歸東京汜水別業

客舍見春草忽聞思舊山
看君灞陵去匹馬成臯還
對酒風與雪向家河復關
因悲宦遊子終歲無時閒

送孟孺卿落第歸濟陽

獻賦頭欲白還家衣已穿
羞過灞陵樹歸種汶陽田
客

舍少鄉信牀頭無酒錢聖朝徒側席濟上獨遺賢

送鄭少府赴滏陽

子真河朔尉邑里帶清漳春草迎袍色晴花拂綬香青
山入官舍黃鳥度宮牆若到銅臺上應憐魏寢荒

還高冠潭口留別舍弟

昨日山有信祇令耕種時遙傳杜陵叟怪我還山遲獨
向潭上酌無人林下碁東谿憶汝處閒卧對鸕鷀

送張子尉南海

不擇南州尉高堂有老親樓臺重蜃氣邑里雜鯨人海
暗三山雨花明五嶺春此鄉多寶玉慎莫厭清貧

送張昇卿宰新淦

官柳葉尚小長安春未濃送君潯陽宰把酒青門鐘水
驛楚雲冷山城江樹重遙知南湖上祇對香爐峰

送陳子歸陸渾別業

雖不舊相識知君丞相家故園伊川上夜夢方山花種
藥畏春過出關愁路賒青門酒壚別日暮東城鴉

送任郎中出守明州

罷起郎官草初分刺史符城邊樓枕海郭裏樹侵湖郡
政傍連楚朝恩獨借吳觀濤秋正好莫不上姑蘇

送四鎮薛侍御東歸

相送淚沾衣天涯獨未歸將軍初得罪門客復何依夢
去湖山濶書停隴雁稀園林幸接近一為到柴扉

送張都尉東歸

白羽綠弓弦年年只在邊還家劒鋒盡出塞馬蹄穿逐

虜西踰海平胡北到天封侯應不遠燕頤豈徒然

送樊侍御使丹陽便覲

卧病窮巷晚忽驚驄馬來知君京口去借問幾時回
舫江風引鄉書海雁催慈親應倍喜愛子在霜臺

送顏少府投鄭陳州

一尉便垂白數年惟草玄出關策匹馬逆旅聞秋蟬
愛客多酒債罷官無俸錢知君羈思少所適主人賢

送秘省虞校書赴虞鄉丞

花綬傍腰新關東縣欲春殘書厭科斗舊閣別麒麟虞
坂臨官舍條山映吏人看君有知己坦腹向平津

送江陵泉少府赴任便呈衛荊州

神仙吏姓梅人吏待君來渭北草新出江南花已開城
邊宋玉宅峽口楚王臺不畏無知己荊州甚愛才

奉送李太保兼御史大夫充渭北節度使

即太尉光

弟弼

詔出未央宮登壇近總戎上公周太保副相漢司空弓

抱關西月旗翻渭北風弟兄皆許國天地苟成功

虢州送天平何丞入京市馬

關樹晚蒼蒼長安近夕陽回風醒別酒細雨濕行裝習
戰邊城黑防秋塞草黃知君市駿馬不是學燕王

送梁判官歸女几舊廬

女几知君憶春雲相逐歸草堂開藥裏苔壁取荷衣老
竹移時小新花舊處飛可憐真傲吏塵事到山稀

送懷州吳別駕

灞上柳枝黃
壚頭酒正香
春流飲去馬
暮雨濕行裝
驛路通函谷
州城接太行
覃懷人總喜
別駕得王祥

送楊子

斗酒渭城邊
壚頭耐醉眠
梨花千樹雪
楊葉萬條煙
惜別添壺酒
臨岐贈馬鞭
看君潁上去
新月到家圓

發臨洮將赴北庭留別

聞說輪臺路
連年見雪飛
春風曾不到
漢使亦應稀
白草通疎勒
青山過武威
勤王敢道遠
私向夢中歸

梁州陪趙行軍龍岡寺北庭泛舟宴王侍御

誰宴霜臺使行軍粉署郎唱歌江鳥沒吹笛岸花香酒
影搖新月灘聲聒夕陽江鐘聞已暮歸棹綠川長

雪後與羣公過慈恩寺

乘興忽相招僧房暮與朝雪融雙樹濕沙闇一燈燒竹
外山低塔藤間院隔橋歸家如欲嬾俗慮向來銷

終南東谿中作

谿水碧於草潺潺花底流沙平堪濯足石淺不勝舟洗

藥朝與暮釣魚春復秋興來從所適還欲向滄洲

登總持閣

高閣逼諸天登臨近日邊晴開萬井樹愁看五陵煙遙
外低秦嶺窗中小渭川早知清淨理常願奉金仙

宿岐州北郭嚴給事別業

郭外山色暝主人林館秋疎鐘入卧內片月到牀頭遙
夜惜已半清言殊未休君雖在青瑣心不忘滄洲

攜琴酒尋閭防崇濟寺所居僧院

相訪但尋鐘門寒古殿松彈琴醒暮酒卷幔引諸峰事
愜林中語人幽物外蹤吾廬幸接近茲地興偏慵

晚過盤石寺禮鄭和尚

暫詣高僧話來尋野寺孤岬花藏水碓谿水映風爐項
上巢新鵲衣中帶舊珠談禪未得去輟棹且踟躕

武威春暮聞宇文判官西使還已到晉昌

片雨過城頭黃鸝上戍樓塞花飄客淚邊柳挂鄉愁白
髮悲明鏡青春換弊裘君從萬里使聞已到瓜州

高冠谷口招鄭鄠

谷口來相訪空齋不見君
澗花然暮雨潭樹煖春雲
門徑稀人迹簷峰下鹿羣
衣裳與枕席山靄碧氛氲

題山寺僧房

窗影搖羣木牆陰載一峰
野爐風自熱山碓水能舂
勤學翻知誤為官好欲慵
高僧暝不見月出但聞鐘

漢上題韋氏莊

結茅聞楚客卜築漢江邊
日落數歸鳥夜深聞扣舷
水痕

侵岼柳山翠借厨煙調笑提筐婦春來蠶幾眠

題金城臨河驛樓

古戍依重險高樓見五涼山根盤驛道河水浸城墻庭
樹巢鸚鵡園花隱麝香忽如江浦上憶作捕魚郎

初授官題高冠草堂

三十始一命宦情多欲闌自憐無舊業不敢耻微官澗
水吞樵路山花醉藥欄祇緣五斗米辜負一漁竿

題號州西樓

錯料一生事蹉跎今白頭縱橫皆失計妻子也堪羞明
主雖然棄丹心亦未休愁來無去處祇上郡西樓

河西春暮憶秦中

渭北春已老河西人未歸邊城細草出客館梨花飛別
後鄉夢數昨來家信稀涼州三月半猶未脫寒衣

早發焉耆懷終南別業

曉笛別鄉淚秋冰鳴馬蹄一身虜雲外萬里胡天西終
日見征戰連年聞鼓鼙故山在何處昨日夢清谿

首秋輪臺

異域陰山外孤城雪海邊
秋來惟有雁夏盡不聞蟬
雨拂羶牆濕風搖毳幕羶
輪臺萬里地無事歷三年

北庭作

雁塞通鹽澤龍堆接醋溝
孤城天北畔絕域海西頭
秋雪春仍下朝風夜不休
可知年四十猶自未封侯

輪臺即事

輪臺風物異地是古單于
三月無青草千家盡白榆
蕃

書文字別胡俗語音殊愁見流沙北天西海一隅

還東山洛上作

春流急不淺歸棹去何遲愁客葉舟裏夕陽花木時雲
晴開蟬蜩發起鷗鷺莫道東山遠衡門在夢思

晚發五渡

客厭巴南地鄉鄰劔北天江村片雨外野寺夕陽邊茅
葉藏山徑蘆花雜渚田舟行未可住乘月且須牽

巴南舟中夜書事

渡口欲黃昏歸人爭渡喧近鐘清野寺遠火點江村見
雁思鄉信聞猿積淚痕孤舟萬里外秋月不堪論

江上春歎

臘月江上煖南橋新柳枝春風觸處到憶得故園時終
日不如意出門何所之從人覓顏色自笑弱男兒

初至犍為作

山色軒檻內灘聲枕席間草生公府靜花落訟庭閒雲
雨連三峽風塵接百蠻到來能幾日不覺鬚毛斑

奉和中書舍人賈至早朝大明宮

雞鳴紫陌曙光寒
鶯囀皇州春色闌
金闕曉鐘開萬戶
玉階仙仗擁千官
花迎劔珮星初落
柳拂旌旗露未乾
獨有鳳凰池上客
陽春一曲和皆難

和祠部王員外雪後早朝即事

長安雪後似春歸
積素凝華連曙暉
色借玉珂迷曉騎
光添銀燭晃朝衣
西山落月臨天仗
北闕晴雲捧禁闈
聞道仙郎歌白雪
由來此曲和人稀

奉和某相公發益昌

相國臨戎別帝京，擁麾持節遠橫行。
朝登劍閣雲隨馬，夜渡巴江雨洗兵。
山花萬朶迎征蓋，川柳千條拂去旌。
暫到蜀城應計日，須知明主待持衡。

秋夕讀書幽興獻兵部李侍郎

年紀蹉跎四十強，自憐頭白始為郎。
雨滋苔蘚侵階綠，秋颯梧桐覆井黃。
驚蟬也解求高樹，旅雁還應厭後行。
覽卷試穿鄰舍壁，明燈何惜借餘光。

使君席夜送嚴河南赴長水

嬌歌急管雜青絲銀燭金杯映翠眉使君地主能相送
河尹天明坐莫辭春城月出人皆醉野戍花深馬去遲
寄聲報爾山翁道今日河南勝昔時

暮春虢州東亭送李司馬歸扶風別廬

柳韉鶯嬌花復殷紅亭綠酒送君還到來函谷愁中月
歸去磻溪夢裏山簾前春色應須惜世上浮名好是閒
西望鄉關腸欲斷對君衫袖淚痕斑

西掖省即事

西掖重雲開曙暉
北山疎雨點朝衣
千門柳色連青瑣
三殿花香入紫微
平明端笏陪鵷列
薄暮垂鞭信馬歸
官拙自悲頭白盡
不如巖下掩荆扉

首春渭西郊行呈藍田張二主簿

迴風度雨渭城西
細草新花踏作泥
秦女峰頭雲未盡
胡公陂上日初低
愁窺白髮羞微祿
悔別青山憶舊谿
聞道輞川多勝事
玉壺春酒正堪攜

赴嘉州過城固縣尋永安超禪師房

滿寺枇杷冬著花老僧相見具袈裟
漢王城北雪初霽韓信臺西日欲斜
門外不須催五馬林中且聽演三車
豈料巴川多勝事為君書此報京華

送盧郎中除杭州赴任

罷起郎官草初分刺史符
海雲迎過楚江月引歸吳城
底濤聲震樓端蜃氣孤
千家窺驛舫五馬飲春湖
柳色供詩用鶯聲送酒須
知君望鄉處枉道上姑蘇

六月三十日水亭送華陰王少府還縣

亭晚人將別，池涼酒未酣。
關門勞夕夢，仙掌引歸驂。
荷葉藏魚艇，藤花罥客簷。
殘雲收夏暑，新雨帶秋嵐。
失路情無適，離懷思不堪。
賴茲庭戶裏，別有小江潭。

送郭僕射節制劍南

鐵馬擐紅纓，幡旗出禁城。
明王親授鉞，丞相欲專征。
玉饌天厨送，金杯御酒傾。
劒門乘嶮過，閣道踏空行。
山鳥驚吹笛，江猿看洗兵。
曉雲隨去陣，夜月逐行營。
南仲今

時往西戎計日平將心感知已萬里寄懸旌

滅胡曲

都護新滅胡士馬氣亦麤蕭條虜塵淨突兀天山孤

寄韓樽

夫子素多疾別來未得書北庭苦寒地體內今何如

題三會寺蒼頡造字臺

野寺荒臺晚寒天古木悲空堦有鳥跡猶似造書時

西過渭州見渭水思秦川

渭水東流去何時到雍州憑添兩行淚寄向故園流

行軍九日思長安故園

時未收長安

強欲登高去無人送酒來遙憐故園菊應傍戰場開

戲題關門

來亦一布衣去亦一布衣羞見關城吏還從舊路歸

題平陽郡汾橋邊柳樹

參曾居此郡八九年

此地曾居住今來宛似歸可憐汾上柳相見也依依

獻封大夫破播仙凱歌四首

漢將承恩西破戎捷書先奏未央宮
天子預開麟閣待祇令誰數貳師功

官軍西出過樓蘭營幕傍臨月窟寒
蒲海曉霜凝馬尾葱山夜雪撲旌竿

鳴笳疊鼓擁回軍破國平蕃昔未聞
大夫鵲印搖邊月天將龍旗掣海雲

日落轅門鼓角鳴千羣面縛出蕃城
洗兵魚海雲迎陣秣馬龍堆月照營

題苜蓿峰寄家人

苜蓿峰邊逢立春，胡蘆河上淚沾巾。
閨中只是空相憶，不見沙場愁殺人。

玉關寄長安李主簿

東去長安萬里餘，故人何惜一行書。
玉關西望堪腸斷，況復明朝是歲除。

武威送劉判官赴磧西行軍

火山五月行人少，看君馬去疾如鳥。
都護行營太白西。

角聲一動胡天曉

虢州後亭送李判官使赴晉絳

西原驛路挂城頭
客散紅亭雨未收
君去試看汾水上
白雲猶似漢時秋

送崔子還京

匹馬西從天外歸
揚鞭只共鳥爭飛
送君九月交河北
雪裏題詩淚滿衣

酒泉太守席上醉後作

酒泉太守能劍舞高堂置酒夜擊鼓胡笳一曲斷人腸
座上相看淚如雨

草堂村尋羅生不遇

數株谿柳色依依深巷斜陽暮鳥飛門前雪滿無人迹
應是先生出未歸

逢入京使

故園東望路漫漫雙袖龍鍾淚不乾馬上相逢無紙筆
憑君傳語報平安

磧中作

走馬西來欲到天
辭家見月兩回圓
今夜不知何處宿
平沙萬里絕人煙

赴北庭度隴思家

西向輪臺萬里餘
也知鄉信日應疎
隴山鸚鵡能言語
為報家人數寄書

趙將軍歌

九月天山風似刀
城南獵馬縮寒毛
將軍縱博場場勝

賭得單于貂鼠袍

秋夜聞笛

天門街西聞搗帛
一夜愁殺湘南客
長安城中百萬家
不知何人夜吹笛

春夢

洞房昨夜春風起
遙憶美人湘江水
枕上片時春夢中
行盡江南數千里

石倉歷代詩選卷四十

欽定四庫全書

集部

石倉歷代詩選卷四十一至三

詳校官庶吉士臣范逢恩

侍讀

臣

孫球覆勘

總校官進士臣朱

鈐

校對官編修臣潘曾起

謄錄監生

臣

蔣

翰

欽定四庫全書

石倉歷代詩選卷四十一

明 曹學佺 編

盛唐十

李頎

東川人

湘夫人

九疑日已暮
三湘雲復愁
宵靄羅袂色
潺湲江水流
佳期來北渚
捐佩在芳洲

塞下曲

黃雲雁門郡日暮風沙裏千騎黑貂裘皆稱羽林子金
茄吹朔雪鐵馬嘶雲水帳下飲蒲萄平生寸心是

古塞下曲

行人朝走馬直指薊城傍薊城通漠北萬里別吾鄉海
上千烽火沙中百戰場軍書發上郡春色度河陽裏裏
漢宮柳青青胡地桑琵琶山色曲曲橫笛斷君腸

漁父歌

白首何老人，蓑笠蔽其身。避世長不仕，釣魚清江濱。
浦沙明濯足，山月靜垂綸。寓宿湍與瀨，行歌秋復春。
持竿湘岸竹，藝火蘆洲薪。綠水晚香稻，青荷包紫鱗。
於中還自樂，所欲全吾真。而笑獨醒者，臨流多苦辛。

東京寄萬楚

蘆落久無用，隱身甘采薇。仍聞薄宦者，還事田家衣。
頽水日夜流，故人相見稀。春山不可望，黃鳥東南飛。
濯足豈長往，一樽聊可依。了然潭上月，適我胸中機。
在昔同

門友如今出處非優游白虎殿偃息青瑣闥且有薦吾表
當看攜手歸寄書不待面蘭茝空芳菲

寄焦鍊師

得道凡百歲燒丹惟一身悠悠孤峰頂日見三花春白
鶴翠微裏黃精幽澗濱始知世上客不及山中人仙境
若在夢朝雲如可親何由覩顏色揮手謝風塵

寄萬齊融

名高不擇仕委世隨虛舟小邑常嘆屈故鄉行可遊青

楓半村戶香稻盈田疇為政日清淨何人同海鷗搖巾
北林夕把菊東山秋對酒池雲滿向家湖水流岫陰止
鳴鵠山色映潛虬靡靡俗中理蕭蕭川上幽昔年至吳郡
常隱臨江樓我有一書札因之芳杜洲

登首陽山謁夷齊廟

古人已不見喬木竟誰過寂寞首陽山白雲空復多蒼
苔歸地骨皓首采薇歌畢命無怨色成仁其若何我來
入遺廟時候微清和落日弔山鬼回風吹女蘿石門正

西谿引領望黃河千里一飛鳥孤光東逝波驅車層城路
惆悵此巖阿

光上座廊下衆山五韻

名嶽在廡下吾師居一牀每聞楞伽經只對清翠光百
谷聚雪色莓苔侵屋梁氣盤古壁轉勢引幽堦長願遊
薜葉下日見金爐香

宋少府東谿泛舟

登岼還入舟水禽驚笑語晚葉低衆色濕雲帶殘暑落

日乘醉歸谿流復幾許

送崔侍御赴京

綠槐蔭長路駿馬垂青絲
柱史謁承明翩翩將有期
千官大朝日奏事臨赤墀
肅肅儀仗裏風生鷹隼姿
一從登甲科三拜皆憲司
按俗又如此為郎何太遲
送君暮春月花落城南陲
惜別醉芳草前山勞夢思

送從叔遊襄陽

言別恨非一棄置我宗英
向用五經筭令為千里行
裏

糧顧庭草羸馬詰朝鳴斗酒對寒食雜花宜晚晴春衣
采洲路夜飲南陽城客夢峴山曉漁歌江水清楚俗少
相知遠遊難稱情同人應館穀刺史在郊迎只合侍丹
宸翻令辭上京時方春欲暮歎息向流鶯

崔五宅送劉跂入京

行人惜寸景繫馬暫留歡昨日辭小沛何時到長安鄉
中飲酒禮客裏行路難清洛雲鴻度故關風日寒維將
道可樂不念身無官生事東山遠田園芳歲闌東歸余

謝病西去子加餐宗伯非徒爾明時正可干躬耕守貧
賤失計在林端宿昔奉顏色慙無雙玉盤

臨別送張謐入蜀

出門便為客惘然悲徒御四海維一身茫茫欲何去經
山復歷水百恨將千慮劒閣望梁州是君斷腸處孤雲
傷客心落日感君深夢裏蒹葭渚天邊橘柚林蜀江流
不測蜀路險難尋木有相思號猿多愁苦音莫向禺山
隱禺山地非近故鄉可歸來眼見芳菲盡

送王昌齡

漕水東去遠送君多暮情淹留野寺出向背孤山明前
望數千里中無蒲稗生夕陽滿舟楫但愛微波清舉酒
林月上解衣沙鳥鳴夜來蓮花界夢裏金陵城歎息此
離別悠悠江海行

留別王盧二拾遺

此別不可道此心常報誰春風灞水上飲馬桃花時誤
作好文士只令遊宦遲留書下朝客我有故山期

晚歸東園

出郭喜見山東行亦未遠夕陽帶歸路靄靄秋稼晚樵
者乘霽歸野夫及星飯請謝朱輪客垂竿不復返

無盡上人東林禪居

草堂每多暇時謁山僧門所對但羣木終朝無一言我
心愛流水此地臨清源含吐山上日蔽虧松外村孤峰
隔身世百衲老寒暄禪戶積朝雪花龕來暮猿顧余守
耕稼十載隱田園蘿篠慰春汲巖潭恣討論洩雲豈知

限至道莫探元且願啓關鎖於焉微尚存

題綦母校書所居

常稱掛冠吏昨日歸滄洲行客暮帆遠主人庭樹秋豈
伊問天命但欲為山遊萬物我何有白雲空自幽蕭條
江海上日夕見丹丘生事非漁釣賞心隨去留惜哉曠
微月欲濟無輕舟倏忽令人老相思河水流

題盧道士房

秋砧響落木共坐茅君家惟見兩童子林前汲井華空

壇靜白日神鼎飛丹砂塵尾拂霜草金鈴搖霽霞上章
人世隔者夾桐陰斜稽首開仙要黃精堪餌花

題僧房雙桐

青桐雙拂日傍帶凌霄花綠葉傳僧磬清陰潤井華誰
能事音律焦尾蔡邕家

題合歡

開花復卷葉艷眼又驚心蝶繞西枝露風披東榦陰黃
衫漂細蘂時拂女郎砧

古從軍行

白日登山望烽火，
黃昏飲馬傍交河。
行人刁斗風沙暗，
公主琵琶幽怨多。
野雲萬里無城郭，
雨雪紛紛連大漠。
胡雁哀鳴夜夜飛，
胡兒眼淚雙雙落。
聞道玉門猶被遮，
應將性命逐輕車。
年年戰骨埋荒外，
空見蒲桃入漢家。

緩歌行

小來託身攀貴遊，
傾財破產無所憂。
暮擬經過石渠署，
朝將出入銅龍樓。
結交杜陵輕薄子，
謂言可生復可死。

一沈一浮會有時
棄我翻然如脫屣
男兒立身須自強
十年閉戶賴水陽
業就功成見明主
擊鐘鼎食坐華堂
二八蛾眉梳墮馬
美酒清歌曲房下
文昌宮中賜錦衣
長安陌上退朝歸
五陵賓從莫敢視
三省官僚揖者稀
早知今日讀書是
悔作從前任俠非

琴歌

主人有酒歡今夕
請奏鳴琴廣陵客
月照城頭烏半飛
霜淒萬樹風入衣
銅鑪華燭燭增輝
初彈淥水後楚妃

一聲已動物皆靜四座無言星欲稀清淮奉使千餘里
敢告雲山從此始

放歌行答從弟墨卿

小來好文耻學武世上功名不解取雖沾寸祿已後時
徒欲出身事明主柏梁賦詩不及宴長楸走馬誰相數
斂迹俛眉心自甘高歌擊節聲半苦由是蹉跎一老夫
養雞牧豕城東隅空歌漢代蕭相國肯事霍家馮子都
徒爾當年聲籍籍濫作詞林兩京客故人斗酒安陵橋

黃鳥春風洛陽陌吾家令弟才不羈
五言破的人共推
興來逸氣如濤湧千里長江歸海時
別離短景何蕭索
佳句相思能間作舉頭遙望魯陽山
木葉紛紛向人落

鮫人歌

鮫人潛織水底居側身上下隨游魚
輕綃文綵不可識
夜夜澄波連月色有時寄宿來城市
海島青冥無極已
泣珠報恩君莫辭今年相見明年期
始知萬族無不有
百尺深泉架戶牖鳥沒空山誰復望
一望雲濤堪白首

欲之新鄉荅崔顥綦毋潛

數年作吏家屢空誰道黑頭成老翁男兒在世無產業
行子出門如轉蓬吾屬交歡此何夕南家擣衣動歸客
銅鑪將炙相歡飲星宿縱橫露華白寒風卷葉度滹沱
飛雪布地悲峨峨孤城日落見棲鳥馬上時聞漁者歌
明朝東路把君手臘日辭君期歲首自知寂寞無去思
敢望縣人致牛酒

荅高三十五留別便呈于十一

累薦賢良皆不就家近陳留訪耆舊韓康雖復在人間
王霸終思隱巖竇清冷池水灌園蔬萬物滄江心澹如
妻子歡同五株柳雲山老對一牀書昨日公車見三事
明君賜衣遣為吏懷章不使郡邸驚待詔初從闕庭至
散誕由來自不羈低頭授職爾何為故園壁掛烏紗帽
官舍塵生白接羅寄書寂寂於陵子蓬蒿沒身胡不仕
藜羹被褐環堵中歲晚將貽故人耻

送康洽入京進樂府歌

識子十年何不過只愛歡遊兩京路朝吟左氏嬌女篇
夜誦相如美人賦長安春物舊相宜小苑蒲萄花滿枝
柳色偏濃九華殿鶯聲醉殺五陵兒曳裾此日從何所
中貴由來盡相許白袂春衫仙吏贈烏皮隱几臺郎與
新詩樂府唱堪愁御妓應傳鴝鵒樓西上雖因長公主
終須一見曲陵侯

送劉十

三十不官亦不娶時人焉識道高下房中惟有老氏經

檻上空餘少游馬往來嵩華與函秦放歌一曲前山春
西林獨鶴引閒步南澗飛泉清角巾前年上書不得意
歸卧東窗兀然醉諸兄相繼掌青史第五之名齊驃騎
烹葵摘果告我行落日夏雲縱復橫聞道謝安掩口笑
知君不免為蒼生

送王道士還山

嵩陽道士餐柏實居處三花對石室心窮伏火陽精丹
口誦淮王萬畢術自言神訣不可求我師聞之玄圃遊

出入彤庭佩金印承恩赫赫如王侯雙峰樹下曾受業
應傳肘後長生法吾聞仙地多後身安知不是具茨人
玉膏清冷瀑泉水白雲谿中日方洗從今不見數十年
鬢髮顏容只如是先生捨我欲何歸竹杖黃裳登翠微
當有巖前白蝙蝠迎君日暮雙來飛

送從弟遊江淮兼謁鄱陽劉太守

都門柳色朝朝新念爾今為江上人穆陵關帶清風遠
彭蠡湖邊芳草春泊舟借問西林寺曉聽猿聲在山翠

潯陽北望鴻雁回
湓水東流客心醉
須知聖代舉賢良
不使遺才滯一方
應見鄱陽虎符守
思歸共指白雲鄉

少室雪晴送王寧

少室衆峰幾峰別
一峰晴見一峰雪
隔城半山連青松
素色峨峨千萬重
過景斜臨不可道
白雲欲盡難為容
行人與我玩幽境
北風切切吹衣冷
惜別浮橋駐馬時
舉頭試望南山嶺

送陳章甫

四月南風大麥黃
棗花未落桐陰長
青山朝別暮還見
嘶馬出門思舊鄉
陳侯立身何坦蕩
虬鬚虎眉仍大顙
腹中貯書一萬卷
不肯低頭在草莽
東門酤酒飲我曹
心輕萬事如鴻毛
醉卧不知白日暮
有時空望孤雲高
長河浪頭連天黑
津吏停舟渡不得
鄭國遊人未及家
洛陽行子空嘆息
聞道故林相識多
罷官昨日今如何

聽安萬善吹觱篥歌

南山截竹為觱篥
此樂本自邇茲出
流傳漢地曲轉奇

涼州胡人爲我吹傍鄰聞者多歎息遠客思鄉皆淚垂
世人解聽不解賞長颼風中自來往枯桑老柏寒颼颼
九雛鳴鳳亂啾啾龍吟虎嘯一時發萬籟百泉相與秋
忽然更作漁陽摻黃雲蕭條白日暗變調如聞楊柳春
上林繁花照眼新歲夜高堂列明燭美酒一杯聲一曲

魏倉曹東堂桺樹

愛君雙桺一樹奇千葉齊生萬葉垂長頭拂石帶煙雨
獨立空山人莫知攢青蓄翠陰滿屋紫穗紅英曾斷目

洛陽墨客遊雲間若到麻源第三谷

照公院雙橙

種橙夾階生得地細葉隔簾見雙翠抽條向長未及肩
泉水遶根日三四青青何必楚人家帶雨凝煙新著花
永願香爐灑甘露夕陽時映東枝斜南庭黃竹爾不敵
借問何時堪掛錫

愛敬寺古藤歌

古藤池水盤樹根左攬右拏龍虎蹲橫空直上相陵突

丰茸離纚若無骨風雷霹靂連黑枝人言其下藏妖魘
空庭落葉作開合十月苦寒常倒垂憶昨花飛滿空殿
密葉吹香飯僧遍南階雙桐一百尺相與年年老霜霰

采蓮

越谿女越谿蓮齊齒雙嬋娟嬉遊向何處采摘且同
船浩唱發容與清波生漪漣時逢島嶼泊幾伴鴛鴦眠
襟袖既盈溢馨香亦相傳薄暮歸去來苧蘿生碧煙

絕纓歌

楚王宴客章華臺
章華美人善歌舞
玉顏豔豔空相向
滿堂目成不得語
紅燭滅芳酒闌
羅衣半醉春夜寒
絕纓解帶一為歡
君王赦過不知罪
暗中珠翠鳴珊珊
寧愛賢不愛色
青娥買死誰能識
果却一軍全社稷

送劉昱

八月寒葦花秋江
浪頭白北風吹五兩
誰是潯陽客
鸕鷀山頭微雨晴
揚州郭裏暮潮生
行人夜宿金陵渚
試聽沙邊有雁聲

送郝判官

楚城木葉落夏口青山遍鴻雁向南時君乘使者傳楓
林帶水驛夜火明山縣千里送行人蔡州如眼見江連
清漢東逶迤遙望荆雲相蔽虧應問襄陽舊風俗為余
騎馬習家池

寄鏡湖朱處士

澄霽晚流濶微風吹綠蘋鱗鱗遠峰見淡淡平湖春芳
草日堪把白雲心所親何時可為樂夢裏東山人

宴陳六樓

樓枕金谷

西樓對金谷此地古人心
白日落庭內黃花生澗陰
四鄰見疎木萬井度寒砧
石上題詩處千年留至今

送錢子入京

夜夢還京北鄉心恨擣衣
朝逢入秦使走馬喚君歸
驛路清霜下關門黃葉稀
還家應信宿看子速如飛

送人尉閩中

可歎芳菲日分為萬里情
閭門折垂柳御苑聽殘鶯
海

戍通閩邑江航過楚城客心君莫問春草是王程

送人歸沔南

梅花今正發失路復何如舊國雲山在新年風景餘春
饒漢陽夢日寄武陵書可即明時老臨川莫羨魚

送顧朝陽還吳

寂寞俱不偶裹糧空入秦宦途已可識歸卧包山春舊
國指飛鳥滄波愁旅人開樽洛水上怨別柳花新

送竇參軍

城南送歸客舉酒對林巒
暄鳥迎風嘯春衣度雨寒
桃花開翠幕柳色拂金鞍
公子何時至無令芳草闌

望秦川

秦川朝望迥日出正東峰
遠近山河淨逶迤城闕重
秋聲萬戶竹寒色五陵松
客有歸歎歎悽其霜露濃

晚歸故園

荆扉帶郊郭稼穡滿東菑
倚杖寒山暮鳴梭秋葉時
回雲覆陰谷返景照霜梨
澹泊真吾事清風別自茲

寄司勳盧員外

流澌臘月下河陽
草色新年發建章
秦地立春傳太史
漢宮題柱憶仙郎
歸鴻欲度千門雪
侍女新添五夜香
早晚薦雄文似者
故人今已賦長楊

寄綦母三

新加大邑綬仍黃
遊與單車去洛陽
顧盼一過丞相府
風流三接令公香
南川稂稻花侵縣
西嶺雲霞色滿堂
共道進賢蒙上賞
看君幾歲作臺郎

送魏萬之京

朝聞遊子唱離歌
昨夜微霜初渡河
鴻雁不堪愁裏聽
雲山況是客中過
關城樹色催寒近
御苑砧聲向晚多
莫見長安行樂處
空令歲月易蹉跎

送李回

知君官屬大司農
詔幸驪山職事雄
歲發金錢供御府
畫看仙液注離宮
千巖曙色旌門上
十月寒花輦路中
不覩聲名與文物
自傷流滯去關東

宿瑩公禪房聞梵

花宮仙梵遠微微
月隱高城鐘漏稀
夜動霜林驚落葉
曉聞天籟發清機
蕭條已入寒空靜
颺沓仍隨秋雨飛
始覺浮生無住着
頓令心地欲皈依

題璿公山池

遠公遯跡廬山岑
開士幽居祇樹林
片石孤峰窺色相
清池白月照禪心
指揮如意天花落
坐卧閒房春草深
此外俗塵俱不染
惟餘玄度得相尋

題盧五舊居

物在人亡無見期閒庭繫馬不勝悲
窗前綠竹生空地
門外青山如舊時
悵望秋天鳴墜葉
嶺岼枯柳宿寒鴟
憶君淚落東流水
歲歲花開知是誰

宿香山寺石樓

夜宿翠微半
高樓聞暗泉
漁舟帶遠火
山磬發孤煙
衣拂雲松外
門清河漢邊
峰巒低枕席
世界接人天
靄靄花出霧
輝輝星映川
東林曙鶯滿
惆悵欲言旋

聖善閣送裴迪入京

雲華滿高閣苔色上鉤欄
藥草空堦靜梧桐返照寒
清吟可愈疾攜手暫同歡
墜葉和金磬饑鳥鳴露盤
伊流惜東別灞水向西看
舊託含香署雲霄何足難

奉送漪叔遊潁川兼謁淮陽太守

罷吏令何適辭家方獨行
嵩陽入歸夢潁水半前程
聞道淮陽守東南卧理清
郡齋觀政日人馬望鄉情
疊嶺雪初霽寒砧霜後鳴
臨川嗟拜手寂寞事躬耕

送盧少府赴延陵

問君從宦所何日府中趨遙指金陵縣青山天一隅行
人懷寸祿小吏獻新圖北固波濤險南天風俗殊春江
連橘柚晚景媚菰蒲漠漠花生渚亭亭雲過湖灘沙映
春火水霧斂檣烏回首東門路鄉書不可無

送喬林

草綠小平津花開伊水濱令君不得意孤負帝鄉春口
不言金帛心常任屈伸阮公能飲酒陶令肯羞貧陽羨

風流地滄江遊寓人菱歌五湖遠桂樹八公鄰青鳥迎
孤棹白雲隨一身潮隨秣陵上月映石頭新未可逃名
利應須在縉紳汀洲芳杜色勸爾暫垂綸

寄韓鵬

為政心閒物自閒朝看飛鳥暮飛還寄書河上神明宰
羨爾城頭姑射山

百花原

百花原頭望京師黃河水流無已時窮秋曠野行人絕

馬首東來知是誰

石倉歷代詩選卷四十一